



Sesida dals

16 d'avrigl 2019

Communitgà ils

18 d'avrigl 2019

Protocol nr.

260

Dumonda Michael (Castasegna)

concernent la reorganisaziun da la polizia chantunala en la subregiun Engiadin'ota / Bregaglia

Resposta da la regenza

Cun il rapport davart la strategia d'immobiglias dal chantun Grischun (missiva da la regenza al cussegl grond; carnet nr. 6/2009-2010) ha il cussegl grond prendì enconuschientscha da la concentrasiun da l'activitad administrativa en nov centers regiunals fermes, ed el ha approvà la strategia da concentrasiun dond ses consentiment al project "sinergia" ed a la pussaivladad d'ina etappaziun. En Engiadin'ota duai perquai vegnir construi in center administrativ regional, nua ch'er la polizia chantunala vegn alloschada. Tenor la planisaziun da l'uffizi da construcziun auta vegn quest center a star a disposiziun l'onn 2024 a Samedan. En il rapport "Polizia grischuna 2015plus", ch'è vegnì approvà da la regenza, è vegnida refusada l'idea d'introducir ina polizia unitara en il chantun Grischun. Il motiv principal è stà quel che la polizia unitara existiva gia per gronda part en il chantun Grischun, tras quai che la polizia chantunala aveva surpiglià contractualmain las incumbensas da las polizias communalas. Areguard la structura da posts da la polizia chantunala prevesa il rapport ina regionalisaziun, per ch'i possa vegnir tegni quint dals cunfins averts e da las pretensiuns en il sector da la polizia da traffic e da segirezza sco er dal cumbat cunter la criminalitad, e quai cun intervenziuns mobilas flexiblas en il rom d'in manaschi nuninterrut da 24 uras.

Tar la dumonda 1: Realisond la finamira strategica prescritta "Rectificaziun da la pitschna structura da posts" ha il cumandant da polizia fixà la nova structuraziun territoriala e la cumpetenza locala ensemen cun las personas responsablas da la regiun Engiadina. Il settember 2018 ha il departament da giustia, segirezza e sanadad approvà la creaziun dal post da polizia Engiadin'ota / Bregaglia. Dapi il 1. da december 2018 existan pia en Engiadin'ota / Bregaglia in post da polizia virtual (sin basa da las infrastructuras a Castasegna, Silvaplauna, San Murezzan e Samedan) e mintgamai ina basa da la polizia da traffic ed ina basa da la polizia criminala a Silvaplauna.

Tar la dumonda 2: La vischnanca da Puntraschigna ha desditg il contract da collavuraziun cun la polizia chantunala. La polizia chantunala è anc adina interessada da metter a disposiziun a la vischnanca da Puntraschigna – tras polizistas e polizists sco er tras assistentas ed assistents da segirezza scolads – las prestaziuns ch'ella ha furnì fin qua en il champ d'incumbensas da la polizia da segirezza ed en l'ulteriur champ d'incumbensas da la polizia communal. La desditga da quest contract n'ha naginas consequenzas essenzialas per l'organisaziun da la polizia chantunala.

Tar la dumonda 3: Tras la nova organisaziun vegn la polizia chantunala ad esser pli preschenta er en la regiun da cunfin ed uschia a furnir dapli prestaziuns da segirezza. La collavuraziun transcunfinala cun ils partenaris da segirezza da l'Italia è ultra da quai vegnida extendida cuntinuadamain ils ultims onns.

Tar la dumonda 4: La superaziun da la catastrofa da la natira a Bondo ha mussà, co che la polizia chantunala furnescha sias prestaziuns er en situaziuns d'urgenza ed en cas da vias serradas. Ella è preparada per tals cas.

Tar la dumonda 5: Saja quai en Bregaglia u en Engiadin'ota: Pervia dals giasts e dals turists internaziunals sco er pervia da la populaziun rumantscha u taliana èn las polizistas ed ils polizists er dumandads fermamain en il sector linguistic. La polizia chantunala ha stgaffì avant intgins onns la pussaivladad da vegnir staziunà sco emprim en la regiun d'origin. Mintg'onn cuntanschan duas fin trais absolventas u absolvents da la scola da polizia da la regiun Engiadina il certificat professional da polizista u polizist. Ellas ed els lavuran e restan lura er en la regiun d'origin.

Tar la dumonda 6: Tras l'installaziun dal post da polizia Engiadin'ota / Bregaglia na vegnan spustadas naginas plazzas da lavur. Il cuntrari: I vegnan stgaffidas plazzas da lavur multifunziunalas cun ina flexibilitad pli gronda areguard la domiciliaziun ed en general cun cundiziuns da lavur pli attractivas per las collavuraturas ed ils collavurators. Quai è decisiv, per che las polizistas ed ils polizists abitan e lavurian da libra voluntad en Engiadin'ota ed en Bregaglia.



En num da la Regenza

Il president:

Il chancelier:

Dr. Jon Domenic Parolini

Daniel Spadin